

**Komunikadu Imprensa**

**Parlamentu Nasionál**

**27 Outubru 2014**

**Parlamentu Nasionál halo apresisaun foun hodi aprova Lei Komunikasaun Sosiál**

Parlamentu Nasionál halo apresisaun foun hodi aprova Lei Komunikasaun Sosiál Iha 27 Outubru 2014, Parlamentu Nasionál (PN) halo apresiasaun no reformulasan ba artigu balun hosi proposta lei n.09/III/(2a) Lei Komunikasaun Sosiál nian hodi halo diskusaun no votasaun iha finál globál hodi haruka fali ba Prezidente Repúblika promulga.

Antes ne'e, Prezidente Repúblika ho ninia póder konstitusionál veta lei ne'e no hodi haruka ba Tribunál Rekursu hodi haree karik lei ne'e konstitui inkonstitusionalidade iha nia parte balun. Tribunál Rekursu iha nia fiskalizacao konklui katak artigu 20, 24 no 40 hosi lei ne'e inkonstitusional, ne'e duni rekomenda ba PN hodi hadi'a.

JSMP hanoin katak média iha papél importante ne'ebé kontribui ba desenvolvimentu nasional iha setór komunikasaun no asesu ba informasaun, nomós promove demokrasiá, transparénsia no akontabilidade iha setór hotu-hotu, públiku no privadu. Lei Komunikasaun Sosiál ne'e importante tebes hodi garante funsionamentu servisu média iha Timor Leste, dehan Diretór Ezekutivu JSMP, Luis de Oliveira Sampaio.

JSMP espera katak ho lei komunikasaun sosial ne'e, instituisaun komunikasaun sosiál sira bele dezenvolve an no forte liu tan iha futuru nomós jornalista sira bele produtivu no profesionál liu tan hodi bele halo kontrolo sosiál ne'ebé efektivu no efikaz.

Observasaun JSMP nota katak deputadu sira halo alterasaun de'it ba artigu rua mak hanesan artigu 20 kona-ba devér jerál jornalista ne'ebé jeneriku liu no konsidera la prienxe prinsípiu tipifikasaun no proporsionalidade no artigu 40 kona-ba koema hodi troka fali termu ida kona-ba kontra ordenasaun. Kona-ba artigu 24 ne'ebé koalia kona-ba kapitál estranjeiru, deputadu sira mantein tanba konsidera atu garantia soberania estadu nian no bazeia ba lei investimentu kapitál estranjeiru.

Lei ne'e pasa ho votu unanimidade iha votasaun finál globál ho votus Afavór: 58, kontra : 0 no abstensaun : 0 husi total 58 deputadu prezente.

---

*Atu hetan informasaun kle'an liu tan favor kontaktu:*

*Luis de Oliveira Sampaio, Diretór Ezekutivu JSMP*

*Telefone: 3323883 | 77295795*

*www.jsmp.tl*

*Facebook: [www.facebook.com/timorleste.jsmp](http://www.facebook.com/timorleste.jsmp) Twitter: @JSMPTl*